

**NATIONAL ASSEMBLY OF
SEYCHELLES**

Thursday 20th October, 2022

The Assembly met at 5pm

National Anthem

Moment of Reflection

Mr Speaker in the Chair

MR SPEAKER

Prezidan Larepiblik, Mr Wavel Ramkalawan, Madanm Linda Ramkalawan, Vis Prezidan Ahmed Afif, Madanm Stella Afif, Minis Dezinyen, bann lezot Minis Gouvernman e lezot zofisyen nou Gouvernman, *Leader* Biznes Gouvernman, Manm Onorab Lasanble nou personnel Sekretarya ki pe asiste nou. Bann Seselwa e manm piblik ki pe swiv nou dan Sesel e aletranze zot tou bonswar e byenveni dan nou Lasanble ozordi. Mersi pou zot prezans avek nou. I en loner pou mwan, pou akey zot pou en rankont spesyal ki en Ladres Par Prezidan Larepiblik.

Prezidan mon envit ou fer ou ladres.

**THE PRESIDENT OF
SEYCHELLES**
MR WAVEL RAMKALAWAN

Mr Speaker, meris pou sa parol lentrodiksyon. Mon adres *Leader* Biznes Gouvernman, *Chief Whip* e tou Manm *LDS* dan Lasanble ki'n reponn sa lapel pou sa diskour.

Vis Prezidan, bann Minis, *DM*. Tou bann o zofisyen dan Gouvernman, Stella, Linda, Deputy Speaker, *sorry* mon'n mank ou dan mon lentrodiksyon. E tou bann travayer Lasanble Nasyonal e Lepep Seselwa. Mon dir zot tou en tre bonn apre midi.

Mr Speaker, mon anvi premyerman lo lapar Legzektiv remersi ou ek Lasanble Nasyonal pou travay ki zot fer pou asire ki bann morso Lezislasyon ki Gouvernman i prezant devan Lasanble pou zot laprouvasyon, pou zot deba e pou zot amannman. Mersi bokou pou sa travay ki zot fer. E ankor enn fwa dan sa dezyenm lannen dan nou administrasyon, zot pe kontinyen fer en travay ekstra ordiner aköz i annan bokou bann morso Lezislasyon ki zot in pase depi Oktob, 2021 e sa byensir i enkli pou donn nou pei Sesel sa Bidze neseser pou ki nou pei in kapab fonksyonnen e nou pei in kapab ariv kot i ete ozordi.

Tre byento, ofet komansman Novanm, zot pou ankor enn fwa ganny sa latas pou zot fer analiz en lot Bidze

e mon swet zot kouraz dan sa travay, mon swete sa lannen i pa ava pran zot en kantite letan akoz apre 2an zot in fini sezi ki mannyer lespri Gouvernman i ete e dan ki direksyon nou pe ale. Alors kouraz e mon dir avek zot donn Seselwa sa ki meyer.

Mon ti ava kontan osi Mr Speaker, remerci lot brans Gouvernman e sa se Zidisyer pou travay ki zot fer, pou delivre lazistis pou nou pep e osi pou gard sa lizye tre tantativ lo travay ki Gouvernman i fer, pou regarde si Gouvernman pa pe al an deor limit e alors mon swet nou brans Zidisyer ansanm avek Lasanble Nasyonal ki avek Egzekitiv i form sa 3 brans Gouvernman tou kouraz. Mersi bokou pou sa dezyenm lannen. Me an menm tan osi tou kouraz letan nou pe komans sa trwazyenm lannen.

Mr Speaker, Sesel i annan tou rezon pou selebre pandan sa 24 mwan ki'n pase. Sa 24 mwan ki'n Komans Oktob 2020. Nou'n ansanm pran bann desizyon ki bon, bann desizyon ki entelizan e par lao tou, bann desizyon ki'n regard byennet Lepep Seselwa e nou pei Sesel.

Atraver sa bann desizyon nou'n montre dan en fason kler ki poudir sa Gouvernman ki an ofis ozordi i annan Lepep

Seselwa a ker e ki nou travay, son latansyon prensipal i vize lo ki mannyer nou pou pran swen avek nou pep e ki mannyer nou pou pas bann lobstak, fer fas avek bann defi e donn nou pep maksimonm posib.

Mr Speaker, mwan mon premye ansanm avek *Cabinet* ki mon dirize pou rekonnèt ki poudir in annan bann desizyon vremen *tough* parey nou dir an angle ki nou'n bezwen pran e ki sa bann desizyon, serten parmi zot in kapab afekte nou pep direkteman. Kot petet nou popilasyon in santi serten, apel li soufrans, apel li lanmertim akoz sa bann desizyon.

Me selman mon anvi fer kler avek nou pep, e zisteman apre midi mon anvi koz kler pou ki nou pep i realize ki en Gouvernman pa tou desizyon ki i pou pran ki pou satisfè tou dimoun. I annan serten desizyon ki tou dimoun pou kontan.

Par egzanp letan ou donn en logmantasyon lapey, tou dimoun pou kontan pou kriy welele. Me selman en Gouvernman i osi annan sa responsabilite pou li pran bann desizyon ki difisil, bann desizyon ki mon a menm dekrir zot koman fermal e letan ou pou analiz byen ou pou dekouver ki sa bann

desizyon i nesese pou nou kapab avans pli devan. Pou nou kapab sirmont serten lobstak.

Ou konnen, i vin egzaktaman parey ki pase dan en fanmir. Parfwa en paran e laplipar nou ki la dan Lasanble, nou bann paran e mon konnen ki lamazorite Seselwa ki pe ekout mwan se bann paran, zot konnen ki poudir parfwa vizavi ou zanfani annan moman kot ou bezwen dir avek li, mon boy oubyen mon fir, papa oubyen manmi pa pou kapab donn ou sa enn la. O kontrer nou pou bezwen redwir sa pti *allowance* ki nou donn ou akoz keksoz i difisil, en pei osi napa diferans.

Me sa ki enportan, a tou moman e se sa lespri avek ki mwan mon annan sa privez ki Lepep Seselwa ti donn mwan an Oktob 2020 pou diriz sa pei. Se avek sa lespri pou nou kapab al pli lwen, pou nou kapab fer pli byen e pou nou donn nou pep sa ki meyer. Se sa lespri ki diriz nou.

Alor mon anvi pep Seselwa sa pep ki mon *cheri* personnelman e sa pep ki mon mars avek zot toulezour, mon anvi dir zot mersi bokou pou zot rezilyans. Mersi bokou pou lafason ki zot in diriz zot lavi, mersi bokou pou la fason ki zot in pran zot responsabilite e la fason ki parfwa dan milye bann defi zot in kapab trouv

bann nouvo dekouvert lo ki mannyer pou zot fer bokou pli byen.

E ozordi letan mon regard nou pep Seselwa mon anvi dir zot ki mwan personnelman mon regard zot avek en gran lafyerte e mon konnen ki poudir nou tou nou pe fer en kontribisyon e se gras a zot kontribisyon ki ozordi nou pei i lo son lipye ankor enn fwa. E ki ansanm nou pou kontinyen fer nou pei vin pli for e nou pou fer nou pei vin meyer.

Nou deza lo sa bon larout, sa i ganny rekonnet partou e mon senpleman anvi envit zot letan nou pe al komans sa vennsenkyenm mwan dan sa manda 5an ki sa Gouvernman in resevwar e ki zot dan Lasanble Nasyonal zot osi zot in resevwar, mon anvi envit Lepep Seselwa pou mars avek nou, pou koz avek nou, pou eksprim zot pour ki ansanm nou ava kapab ganny sa bon direksyon. Nou ava kapab pran bann bon desizyon ki pou fer nou vremen vin en pep solid.

E la letan mon pe remersi Lepep Seselwa mon anvi dir avek zot ki fodre pa a okenn moman nou oubliy kote nou sorti. Bann politisyen avan mwan ti dir fodre zanmen nou oubliye kote nou sorti pou nou konnen kote nou pe ale.

E kwa ki nou ti erite, i enportan pou nou mazine sa, akoz ozordi atraver sa 24mwan la fason ki nou'n kapab fer travay, la fason ki nou'n kapab fer sakrifis kot fodre petet i annan bokou dimoun ki komans oubliye. Bokou dimoun i rekomans antre dan en *zone* konfor e zot konfor i fer zot bliye ki manner margoz ti vremen anmer.

Annou mazine COVID, annou mazin ki manner nou pa ti konnen ki manner pou pey bann saler an 2020, ki manner bann biznes pa ti kapab pey travayer. E ti annan *FA4JR* ki zot koman en Lasanble Nasyonal zot in kapab resevwar rapor e osi dekouver bann koripsyon ki ti annan dan la fason ki sa *Scheme* ti marse.

Mazin \$1, R22 mazin viv lo lavans ki Labank Santral i donnen. Mazin en erport ki'n fermen, mazin *Air Seychelles* avek plis ki \$100milyon det. E mazin osi bann lezot soufrans e mon plis ki sir si nou onnet avek nou lekor sakenn antre nou pou kapab idantifye ki sa margoz anmer ki nou'n pas ladan.

Nou bezwen mazin sa pou nou kapab pran bann rezolisyon ki vremen serye, bann rezolisyon ki vremen bon pou nou kapab avans devan. Parske nou, nou pa anvi a

okenn moman retourn an aryer, nou anvi al dan en sel direksyon e sa se devan ver semen progre, ver semen prosperite pour tou Seselwa nenport ki leta ki ou viv ladan, nenport ki kouler ki ou ete, nenport ki parti politik ki ou siporte akoz nou tou nou en zanfan Sesel e tenm anba ki mon ti ganny elekte se Sesel Pou Tou Son Zanfan.

(APPLAUSE)

THE PRESIDENT OF SEYCHELLES
MR WAVEL RAMKALAWAN

E zisteman Mr Speaker, letan nou pe regarde ki manner nou'n bouz devan e ki bann desizyon *tough* ki nou'n bezwen pran, nou bezwen osi mazine ki nou ti ganny dir. Nou ti ganny dir kennsel tou ban proze kapital, savedir aret fer lakaz pou nou pep. Savedir aret fer bann fasilite pou bann peser, savedir aret okip bann dimoun Mahe, Praslin, La Digue. Aret konstriksyon Lopital La Digue, pa bezwen fer terminal pasaze pou Praslin, pa bezwen re sirfas bann semen lo Praslin, aret kontinyasyon semen Pasquere, aret fer devlopman por lo La Digue.

Aret zot proze *sewage*. Lo Mahe pa bezwen fer *dual carriageway* ki'n ede pou soulaz trafik, pa bezwen fer sa

nouvo *lane* ki ozordi ant *STC* avek Roche Caiman ki ozordi pe ed nou sirkilasyon trafik.

Aret konstriksyon lekol Belonie, aret *maintenance* e refer *National Library*, aret rod posibilite pou nou annan en *archives*. Se sa ki nou ti ganny dir, aret tou proze kapital.

Eski pou en moman zot kapab mazine kot nou pei ti pou ete si nou ti'n ekout sa bann profet e aret tou sa bann proze kapital? Me pa zis sa. Nou ti ganny dir pa bezwen don vaksen nou pep, nou ti ganny dir pa bezwen reouver erport akoz sa i en desizyon iresponsab. Ti menm annan bann program *boycott* vaksen parmi ban politisyen.

Mr Speaker, nou ti ganny dir tou kalite keksoz e tousala ti ganny dir zis pou fer sa ladministrasyon *fail*, e letan sa ladministrasyon ti pou *fail*, Sesel ti pou *fail*.

Me nou nou'n dir non, e lo *Cabinet* in annan bokou bann moman kot nou'n pran sa bann desizyon. In annan bokou sa bann moman enportan kot nou'n reflexir, kot nou'n dir be eski dimoun pou vreman aksepte sa? E ki mannyer nou pou kapab satisfere nou dimoun. Me selman a tou moman nou ti dir nou, nou pe travay pou Lepep Seselwa, nou pe rod sa ki meyer, e avek bon

planifikasyon nou ti nobou tras sa semen.

Mr Speaker, avek sipor Lasanble Nasyonal e la ankor enn fwa bann Manm *LDS* ki la prezan ozordi pou en tel lokazyonn si enportan mon anvi dir zot avek tou mon leker e osi lo lapar *Cabinet* mon anvi dir zot mersi bokou pou la fason ki zot in akonpany nou.

(APPLAUSE)

THE PRESIDENT OF SEYCHELLES

MR WAVEL RAMKALAWAN

Mr Speaker, nou ti pran desizyon tel ki pou nou reouver erport, pou nou al dan en program vaksinasyon. E wi letan nou, nou ti antre dan program vaksinasyon nou ti parmi bann premye pei, non-selman lo nivo Lafrik, me parmi ban premye pei dan lemonn. Letan Lerop ti ankor pe kestonnen si zot pou donn vaksen zot pep, nou pti Sesel nou ti pran sa desizyon.

Mwan Mr Speaker, mon ti vin premye Sef Deta Afriken pou pran en vaksen *COVID* e pour sa mon fyer. Mr Speaker, atraver sa nou ti kapab reouver nou pei. E an 2021 nou Lendistri Tourizm ti kapab anmenn 182mil viziter. E atraver sa se sa ki'n permet nou avek larzan ki nou'n

gannyen, ki'n permet nou fer Dolar desann. E ki'n permet nou kapab kontinyen, avek bann proze kapital ki'n permet nou kapab soulaz nou pep, ki'n permet bann biznes kapab rebran avek en nouvo lelan. San ki zot depann lo larzan Gouvernman, e ki in osi permet Lepep Seselwa pran son responsabilite. Refer Lepep Seselwa konnen ki poudir dan lavi fodre ki nou depann lo nou, lo nou prop lekor.

E fodre ki nou debout lo nou lipye, donk sa in arive. Bann *airlines* in antre gos a drwat. E ozordi Mr Speaker, letan mon pe adres Lasanble Nasyonal ek Lepep Seselwa nou'n fini depas sa sif enn pi git par lao 250mil ki nou ti'n mete koman nou estimasyon pour sa lannen.

E la ozordi nou a pe prevwar ki poudir lafen lannen 2022, nou pou'n resevwar plis ki 300mil viziter. E avek sa 300mil viziter, nou pe osi ekspekte ki poudir larzan ki pei pour anmase i pou bokou pli o e se sa ki pou kapab permet nou, komans ankor bann nouvo proze lakaz ki pou kapab permet nou konplet bann lekol ki nou'n komanse. Ki pou permet nou bann zenn al Liniversite e kontiny zot letid. Ki pou permet bann Seselwa, ki nou, nou pa kapab donn zot tretman medikal isi,

pou zot kapab al aletranze pou prolonz zot lavi e pour zot ganny en meyer standar lasante. E ki pou osi permet tou nou pep, anmezir ki nou rann Lepep Seselwa bann benefis ki nou resevwar, fer zot ganny en meyer lavi.

E Mr Speaker, ozordi letan nou regard pti *Air Seychelles* pe anvole, se sa ki'n permet nou kapab atraver bann desizyon ki nou'n pran, se sa ki'n permet nou kapab fer desann det par lao 100milyon, pour nou retir *Air Seychelles* kot i ti ete san ki en travayer in bezwen ganny fer *redundant*. Se sa osi ki'n permet nou pour ki sa lannen nou pou kapab donn tou travayer en trezyenm mwan lapey .

(APPLAUSE)

THE PRESIDENT OF SEYCHELLES

MR WAVEL RAMKALAWAN

E ki zot ava kapab al dan lakour avek bokou plis larzan dan zot lanmen pou zot nobou soutenir zot fanmir.

E zisteman lo sa pwen trezyenm mwan, mon anvi dir avek tou Seselwa pa bezwen ekout bann dimoun ki dir zot pou ganny zis 50poursan. Pep Seselwa, sak travayer e la mon komans avek travayer dan *civil service*. Sak travayer i kapab al dan lakour avek 100

poursan. Ou konnen ki mannyer zot pou ganny 100 poursan baze lo sa lot 50 poursan. Se senpleman delivre pour Lepep Seselwa e zot ava score 100 poursan, e alor zot ava ganny zot trezyenm mwan an antye. Se sa ki mon ankouraz zot pou fer.

E alor Mr Speaker, sa ladministrasyon LDS, apre 24 mwan i kontinyen prezant li koman en ladministrasyon ki serye. E se pour sa rezon ki ankor enn fwa mon poudir Sesel ek Seselwa i annan tou rezon pou selebre ozordi.

(APPLAUSE)

THE PRESIDENT OF SEYCHELLES

MR WAVEL RAMKALAWAN

Seselwa i bezwen fyer ki zot annan en Gouvernman, ki pa gard larises ki pei i prodwi pour li menm. Ki pa partaz sa larises zis antre serten zanmi. Me a tou moman nou retourn bann benefis atraver nou bann plan ek Lepep Seselwa.

E ki nou'n vwar espesyalman pandan sa dernyen lannen. Letan pei in komans fer byen, nou'n bouze pou sorti donn enn de etidyan en goute lo *Dedicated Fund* pour nou donn tou zanfan, tou zanfan dan lekol primer *breakfast* ek dezennen.

Tou zanfan dan lekol segonder, *breakfast* e bann ki

dan bezwen, *lunch* sorti dan *Dedicated Fund*. Nou'n kapab donn en rediksyon, lo *Bill* elektrisite. Nou'n kapab donn dimoun en soulazman tanporer R500. Nou'n kapab sanz bann *weights* ki ganny servi, bann sistenm ki ganny servi pou *welfare* pou donn nou dimoun en pli bon lasistans. Nou'n kapab redwir kou *fuel*, kou bennzin lo laponp, e nou'n kapab osi par ogmant tarif elektrisite.

Nou'n kapab parey nou pe fer sa lannen, donn enn trezyenm mwan. Nou'n kapab asiste bann dimoun ki annan bann bato kargo ant Mahé, bann dimoun Praslin ek La Digue. Nou'n kapab donn zot en konsesyon *fuel* e nou'n kapab osi mentenir pri komodite lo en nivo ki akseptab. E sa pa zis pou Mahé me osi pou Praslin avek La Digue.

Se sa, sa enn de legzanp kot tou benefis ki nou lekonomi i fer, tou progre ki nou fer, nou pas li avek nou pep. Akoz finalman nou, nou en Gouvernman ki a pe travay pour son pep, pou asire ki son pep i ganny li en meyer lavi e se pour sa rezon ki nou akonpany nou pep dan tou moman e dan tou staz son devlopman.

Mr Speaker, sa ladministrasyon Sesel ozordi i enn ki serye e nou sitan serye

kot parfwa dimoun i kapab zis vini pik lo enn de pti keksoz ki mwan mon apel, bann pti keksoz ki pa vreman konte. Par egzanp letan mon tann politik palto. Mon dir be kisisa sa, kot pou anmenn nou sa. Kote nou pou ale avek sa, letan ou konpar avek konstriksyon ki nou pe fer. Letan ou konpar avek ledikasyon, avek lasante ki nou pe donn nou pep.

Alor fodre nou, port atansyon, fodre pa ki pep Seselwa zot les zot ganny distrer avek bann keksoz ki ganny met devan nou. Fodre pa ki nou zis taye sot anler, e avan ki nou reflexir nou'n fini fer bann komanter ki zis apre nou dir si mon ti konnen.

Mr Speaker, ozordi nou vreman fyer koman Sesel, letan nou Minis Finans i dir avek nou ki nou lekonomi in grandi par 10.6 poursan. Tandis ki bann lezot gran lekonomi dan lemonn zot pe anrezistre en *growth of* 3 poursan oubyen mwens. Letan nou aprann ki lenflasyon lo nivo mondial i ant 7-10poursan. Me ki nou Sesel, lenflasyon i anviron 3 poursan.

Se sa ki mon dir avek Seselwa, annou pa les nou ganny distrer, annou reste *focus* a tou moman e prepar nou pour okenn evantyalite. E se sa osi ki sa Gouvernman i

fer. Nou pa nek zis letan nou fer enn pti lekonomi, nek zis nou vini nou depans tou. Nou kriy welele parey malerezman serten nou, serten dimoun dan nou popilasyon ki letan i ganny peye, lafen dimwan deswit i ale i depans tou son larzan e apre premye semenn dan nouvo mwan i a pe vin rod davans.

Nou, nou pa fer sa nou. Nou, nou kalkil tou bann keksoz byen kot nou santi nou kapab fer byen, nou kapab fer li byen. E la mon anvi dir avek Lepep Seselwa, byensir Minis Finans semenn prosenn, komansman Novanm i a vin donn bann detay. Mon anvi dir avek Seselwa. Ki aköz nou'n fer byen, sa soulazman tanporer ki nou ti donner, lannen prosenn i pou vin permanan.

(APPLAUSE)

THE PRESIDENT OF SEYCHELLES

MR WAVEL RAMKALAWAN

Lannen prosenn ki pou annan en logmantasyon lapey e sa logmantasyon lapey i pou plis ki sa R500 tanporer ki nou'n donn zot pandan sa lannen.

(APPLAUSE)

THE PRESIDENT OF SEYCHELLES

MR WAVEL RAMKALAWAN

Mr Speaker, parey mon'n dir, mon personelman mon vremen fyer. Mon fyer ki mon kontinyen administre sa pei ansanm avek *Cabinet* ki la lo mon kote anba sa slogan 'Sesel pou tou son zanfan'. Toulezour mon renouvle mon langazman anver sa slogan ek son prensip.

Ozordi dan nou pei Sesel napa okenn viktimizasyon politik. Mon repete, napa okenn viktimizasyon politik dan nou pei Sesel.

Ofet Mr Speaker, mon bezwen dir ki parfwa menm bann dimoun ki ti mon bann oponan dan politik zot vini onnetman zot koz avek mwan. E zot parfwa eksprim zot sok ki zot ankor dan zot travay oubyen ki zot in ganny en promosyon oubyen ki zot kontra in renouvle.

Mr Speaker, ladministrasyon ki ozordi pe diriz sa pei pa regard en dimoun lo son kouler politik. I pa regard en dimoun lo son larelizyon. I pa regard en dimoun lo ki fanmir ki i sorti ladan. Ozordi nou regard dimoun, nou regard sak Seselwa lo son abilite, lo son merit pou dan en pozisyon.

E la mon anvi dir avek tou bann dimoun ki ti vot pou mwan. Se sa osi, oubyen ki pa ankor tro konpran sa prensip. Mon anvi dir avek zot se sa, sa

nouvo Sesel ki nou pe kontinyen kree.

Akoz nou anvi bouze pou nou sorti dan sa Sesel kot in annan tro bokou divizyon. Kot in annan tro bokou laenn. Kot in annan tro bokou vanzans. E nou anvi ki sa nouvo staz dan nou devlopman ki ti komanse an 2020, Oktob 2020 i kontinyen e nou pouse ziska ki vremen nou vin en pep ini.

Mon ti vremen kontan letan mon ti *New York* letan mon pe koz avek Anbasader Ian Madeleine. Nou Anbasader kot *UN*, e Lanmerik e plizyer bann lezot pei. Kan mon ti dir avek li, mon dir li Anbasader ou konn enn keksoz? Letan rekomandasyon ti vini pou ou ganny apwente koman Anbasader mon ti zis sinyen.

E parey ou konnen mon pa ni ti *interview* ou. Mon pa ni konnen kote ou ti vote. Me selman mon'n fer li aköz tou bann rekomandasyon ti pozitiv e ou, ou e zanfan Seselwa. Alors nou dir tou zanfan Sesel i merit son loportinite.

(APPLAUSE)

THE PRESIDENT OF SEYCHELLES
MR WAVEL RAMKALAWAN

E la mon anvi dir ki Anbasader Madeleine pe fer en travay ekstraordiner pou nou pei. E

mon konnen poudir letan i ti vin devan Lasanble zot ki ti demann li kestyon. E apre zot ti aprouv li. E la mon anvi dir zot Lasanble zot in vreman donn Sesel en bon zanfan, en zanfan travayer, en zanfan ki a pe delivre pou son pei. Alors merci bokou.

Mr Speaker, malerezman mon bezwen dir. Tandis ki nou kontinyen fer en lapel pou tou zanfan Sesel travay mon remarke ki pa tou zanfan Sesel ki pe travay pou Sesel. Se sa ki ozordi i annan fristrasyon dan bokou lenstans. Akoz pa tou zanfan pe ki travay. E sa bann zanfan ki pa pe travay zot in vin bann move zanfan. I pa akseptab ki nou pep. E mon'n dir sa lo plizyer repriz isi. Isi menm dan Lasanble e dan bann lezot diskour ki mon'n fer. I pa akseptab ki en sitwayen Sesel i pa resevwar sa servis ki i pe rode a ler oubyen i pa zanmen ganny en larepons e ki sa i fer li fristre.

Mr Speaker, i annan diferan kategori ozordi ki pe fer sa fristrasyon. E la ankor enn fwa mon anvi ki Seselwa i konpran mwan byen. Premye kategori se bann zanfan Sesel ki determinen pou fer Seselwa fristre. E letan zot ava fer Seselwa fristre. Seselwa i ava fristre avek ladministrasyon ki mon dirize akoz pou zot, zot

lobzektif i en lobzektif politik pou detri sa ladministrasyon.

Dezyenm kategori se bann zanfan ki pares pou fer sa ki zot devret fer. E alor desizyon ki zot kapab pran ozordi, zot anvoy li pou demen, zot anvoy li pou 2 semenn, zot anvoy li pou 3 semenn. E parfwa zot anvoy li pou 6 mwan.

Trwazyenm kategori zanfan malerezman se bann zanfan ki mank serten konpetans. Sa i bezwen sanze dan sa pei Sesel. E letan nou pe antre lo vennsenkyenm mwan, mon anvi egzakteman parey mon ti dir lo size drog. Mon anvi dir avek tou dimoun ki dan *civil service* ozordi, pran li koman *warning* final. Nou pou bezwen pran aksyon avek bann zanfan ki pe fer Lepep Seselwa viv dan fristrasyon.

(APPLAUSE)

THE PRESIDENT OF SEYCHELLES
MR WAVEL RAMKALAWAN

Mon fer en lapel pou ki i annan en sanzman lespri. Mon fer en lapel pou ki dan tou Departman Gouvernman dimoun i ganny en solisyon pou zot problem. E la mon demann tou dimoun ki pe travay dan Gouvernman. Pa bezwen prolonz soufrans en dimoun. Me plito vin bann dimoun ki rod solisyon. E si

nou kapab ed dimoun pou rod solisyon pou zot bann problem. Si nou kapab akonpany nou pep, mon krwar la nou pei li menm i pou pran en nouvo lelan.

Annou silvouple dan bann Departman Gouvernman oubyen dan nenport landrwa kot nou servi lepep, annou arete avek sa larogans. Annou retourn ankor pou nou konn dir bonzour en kliyan ki vin devan nou. Annou met sa telefonn ater, premyerman ou pa ni pe devret pe servi sa *mobile phone* pou ou koz avek ou zanmi letan ou pe travay.

Annou donn sa dimoun ki devan nou tou son latansyon e donn li tou sa servis ki i merite. Alors mon demann tou bann dimoun an komans bann ki dan *civil service*. Me osi bann ki dan Sekter Prive pou ede pou larg lanmen Lepep Seselwa olye fer en dimoun esper en kantite letan. Parski letan, personn napa sa kantite pou atann. E alor mon espere lo sa.

Me selman mon anvi osi fer en lapel avek Lepep Seselwa. Letan ou vin rod en servis, ou osi tou apros sa dimoun dan en fason avek kourtwazi. Ou pa bezwen vini ou osi tou avek larogans. Pa bezwen vini pou ou maltret sa dimoun. Pa bezwen vini pou ou abes sa dimoun. Si enn ki

donn servis i fer li avek kourtwazi, lot ki pe resevwar en servis i osi fer li avek kourtwazi. Mon krwar nou ava kapab ganny en solisyon e nou ava kapab al devan.

Alor Mr Speaker, pou mwan letan mon vin adres Lepep Seselwa, spesyalman apre plis ki 30an dan politik. Mon krwar ki nou tou nou devret konnen ki mannyer nou pei i ete, e kwa ki nou bezwen fer pou fer li avans devan. Bann defi parey mon'n dir, enn de bann defi nou konnen sa bann defi. E petet Lepep Seselwa li menm li i konnen ki solisyon i pou bezwen donner. Sa dimoun ki ti pe travay dan Gouvernman i konnen ki i bezwen fer li pou li kapab ed en dimoun. Akoz i ed serten e i pa ed lezot. Akoz i pa ed tou. Savedir i konnen. Me i fer li pou kek rezon ki li parfwa i konn pli byen.

Me nou, letan nou pe koz sa transformasyon, letan nou pe koz sa nouvo Sesel, nou'n reisi frer ek ser kree en Sesel kot dwa sak endividi e son laliberte i ganny respekte.

Ozordi napa en Seselwa ki kapab dir Lapolis in aret li e i pa'n ariv dan en kordgard. Napa personn ki kapab dir, in ganny arete e i pa'n kapab koz ek son Avoka. Napa person ki kapab dir, in ganny arete me in ganny anmenn dan sed. Oubyen ki poudir son fanmir i

ava dir in fini anba en pon. Sa bann zafer in fini sa.

Ozordi nou en pei kot the *Rule of Law* i renye. E letan nou pe dir *the Rule of Law*, nou a pe dir kot sa bann laliberte ek sa bann dwa i ganny respekte. E se la kot ankor enn fwa mon fer en lapel avek Lepep Seselwa. Letan ou annan sa laliberte lekspresyon, aprann servi li byen. Parski tro souvan bann ki annan lafors, bann ki kapab eksprim zot pli byen, zot anbet bann ki pli feb e aprezan zis nou vin en pei rimer. Nou vin en pei kot en zour ou tann en keksoz, lot zour ou tann en lot keksoz. Apredmen sa menm keksoz i ganny transformen dan en nouvo keksoz. E tousala se bann mansonz.

Alors mon pe dir, annou apros keksoz, annou apros lavi li menm dan en fason serye. E la mon ava dir, annou komans isi dan sa Lasanble. Annou komans isi dan sa Lasanble kot tou bann Manm Lasanble ki bann politisyen serye, olye ki nou servi sa moman pou nou dir nenport kwa senpleman pou senm konfizyon, kot nou komans koz antyerman zis laverite e sa i ava fer ki tou nou pep i ava ganny sa leklersisman e nou pep i ava konnen dan ki direksyon zot pe ale. E la pour lemoman parey bokou nou i konnen, i annan en konpany

serye pou sali non Sesel lo nivo enternasyonal e sa pe ganny dirize, nou konnen lekel ki pe diriz sa bann kanpany, pe ganny dirize senpleman akoz zot, zot anvi sey prezant zot lekor koman bann viktim. E alors zot ekri tou kalite keksoz.

Mon anvi demann zot menm zot koman Lasanble, silvouple anmenn bann Mosyon pou ki nou kapab adres sa bann fo lenformasyon, sa bann *attempts* pou sali non Sesel e pou fer krwar ki poudir Sesel napa dwa imen, Sesel tou keksoz i ganny kontrole, Sesel i en diktatir, Sesel ensidswit, ensidswit. Alors annou vin bokou pli alert lepep Seselwa e olye propaz sa bann mansonz, annou rod son laverite.

Mr Speaker, letan mon pe adres Lepep Seselwa, mon anvi definitivman parski sa parey zot konnen i enn bann lapel ki mon'n fer depi o komansman e i reste enn bann lager ki mon'n dedye mon Prezidans pou mon anmennen e sa se sa lager kont drog. E la mon anvi felisit Lapolis avek *Seychelles Defence Forces* e avek tou lezot dimoun ki pe ede pou nou kapab anmenn en bon lalit.

Mr Speaker, zis pou dir ki dan sa dernyen mwan nou estimen ki nou'n kapab anpes

plis ki 200 kilo drog antre dan nou pei.

(APPLAUSE)

THE PRESIDENT OF SEYCHELLES

MR WAVEL RAMKALAWAN

E sa nou'n kapab fer li atraver en loperasyon lo lanmer, nou'n kapab fer li atraver loperasyon lo erport e nou'n kapab osi fer li dan bann loperasyon ki pe kontinyelman arive dan tou bann kwen nou pei. Sa bann loperasyon pou kontinyen e zot pou kontinyen avek bokou plis lelan pou nou kapab protez nou bann zenn kont sa fleo. E pli boner mon'n ganny demande en kestyon dan en program ki dir avek mwan, be konmsi i resanble zis bann pti pwason ki pe ganny tyonbo, bann gro pwason pe sape.

E bon, larepons sete malerezman bann gro pwason i annan bann makro ki vey zot, bann pti pwason sa makro ki pe protez zot e alors zot kapab pase. Me selman mon kontan pou dir ki gro pwason osi tou in komans pri dan sa lasenn ki nou'n mete pandan sa dernyen 2an e nou pou kontinyen e mon demann, e la mon fer en lapel parske letan kestyon ti ganny demande dan Lasanble, mon ti tann lopoziyon pe eksprim sipor pou sa lalit kont drog.

Parti *LDS* ti osi eksprim zot sipor, alors mon demande e mon fer en lapel pou tou bann *MNA* pou zot raport bann ka kot i annan drog dan zot distrik e aksyon aproprye i ava ganny pran. Ou konnen ki poudir ozordi kominote pe sipor nou dan sa lalit e nou pe resevwar bokou lenformasyon e nou esper ki poudir ant isi avek Desanm pou annan bokou plis loperasyon ki pou ganny fer e mwan mon pou premye pou vin donn zot detay lo tou sa bann keksoz ki nou pe fer e ki mannyer keksoz pe bouze.

An menm tan osi, petet sa kiltir drog in amenn en kiltir vyolans ki nou pa abitye avek. E mwan sa i trakas mwan en kantite. Ozordi letan ou tande en dimoun lekor in ganny anmase lo lans. Letan ou tande i annan lager dan kominote e dimoun pe lager konmsi ou a krwar bann zimaz. Ou pa pe regard Sesel, ou pe regard en lot pei kot dimoun i ankor servi bann metod barbar pou zot rezourd zot difikilte.

Letan ou aprann ki bann zanfan pe ganny *kidnap*. Letan ou aprann ki serten dimoun pe menas lezot. Tousala se bann keksoz ki pa dan nou kiltir. Pa nou sa, parey nou dir. Pa Seselwa sa.

Alors mon demande ankor enn faw ki Seselwa,

annou adopte sa kiltir lape. Annou adopte en kiltir kot nou rod rezourd nou bann problem dan en fason amikal oubyen dan en fason kot nou pa anmenn vyolans, dan en lesey pou nobou trouv en solisyon. E la mon osi fer en lapel parski ozordi i annan tro bokou kouto lo semen e dan tou bann *raids* ki bann group Lapolis avek Militer i fer, nek zis nou vwar zarm, nou vwar gran kouto. Nou trouv kannif, nou trouv sa bann pti kouto zonn ki bann *stevedores* i servi.

E la mon anvi fer en lapel avek bann lakonpanyen *stevedores* pou zot silvouple annan en pli gran kontrol, donn bann dimoun zot zouti travay letan zot pe travay me apre sa anmase. Akoz sa bann kouto i danzere e i annan tro bokou lo nou bann semen. E sa parfwa menm dan bann *disco*. Letan dimoun i al *disco* zot anmenn en kannif avek zot e apre ou tande dimoun in ganny blese.

Alors annou sorti dan sa kiltir vyolans e annou al ver sa kiltir ki nou vremen apel kiltir kreol. E la ki ozordi nou pe lans ofisyelman Festival Kreol, kot nou tou nou pou sante lasezon krol in re fleri. Les nou ankor enn fwa santi loder patsouli e tou. Annou kot nou pou bat nou tanbour moutya, nou pou dans sega.

Annou les sa lespri diriz nou koman en pep e sa i ava anmenn nou byen. I ava fer nou konstri bann kominote kot dimoun i viv anpe. Kot napa drog, kot napa lanmizik for, kot i annan respe e kot sakenn i pran swen avek kanmarad.

Pep Seselwa mon anvi ankor enn fwa adres sa size kou lavi. Ankor enn fwa se bann size ki tous nou tou e la mon anvi fer en lapel ozordi avek Seselwa li menm, pou dir avek Seselwa annou aret touy nou frer avek nou ser e apre plennyen ki poudir kou lavi i o.

I annan bokou lenstans kot se nou menm nou ki fer kou lavi monte. E mon anvi osi fer en lapel avek bann marsan, spesyalman bann ki aste avek *STC* e sa semenn sa *SI* in ganny pase la devan Lasanble lo *maximum retail price*. Mon anvi dir avek bann marsan, silvouple zot osi tou montre ki poudir ki zot pe partisip dan lavi Sesel e ki zot, zot pa pe zis sey ranpli zot pos o pli vit posib avek plis larzan. Me ki zot osi zot anvi war Lepep Seselwa ganny en meyer lavi.

E mon ti vremen soke lot zour letan en madanm ti met en *post*. Letan i ti a pe dir ki i aste en komodite e lo la i war R30, letan i ariv devan pou li peye sa marsan i dir avek li R34. E aprezan i montre sa marsan sa R30, me letan i pe

sorti dan laboutik en komi pe deza sanz tou pri pou sorti R30 pou vin R34. Sa ban kalite keksoz annou pa fer li silvouple.

E se pour sa rezon ki Gouvernman in pran konsiderasyon ban bato par egzanp ki transport kargo pou donn zot bennzin pli bon marse zisteman pour ki nou pep i kapab viv byen. Annou fer li ansanm, annou fer li ansanm e nou tou nou ava reisir ansanm koman en sel fanmir.

Mr Speaker, i annan bokou defi e nou, nou bann premye pou rekonnèt bann defi. Mon ti kontan letan Minis Lasante ti vin isi e i ti dir pa defayans ki nou annan, se defi ki nou annan. E zisteman se sa ki nou annan e bann legzanp ki Minis ti donner se bann legzanp ki ozordi mon konnen. Parske mon ekoute Lepep Seselwa mwan. Mon tande letan zot koz lo sistenm lasante e la mon anvì dir ek zot, nou pe sey fer tou nou, pou nou kapab don sa pasyan, donn sa kliyan meyer servis.

Me selman parfwa malerezman ankor enn fwa se sa dimoun ki sipoze zis anmas en telefonn pou telefonn en dimoun ki Val D'en D'or, pou dir avek li pa bezwen desann pou admet akòz i annan en *issue*, ki pa fer li. Aprezan sa dimoun i sorti Val D'en D'or in

ariv Lopital Victoria e apre zot dir avek li i bezwen retourn Val D'en D'or.

Byensir, nenport nou ti pou ankoler, nenport nou ti pou fristre. Alor parfwa se sa bann ti pti keksoz, kot parfwa en pti *phone call* pou regarde si petet sa latizann ki sa dimoun pe rode, si napa dan en farmasi pou kapab ed li. Bann ti pti keksoz. E mon konnen ki poudir sa bann defi, e la mon donn Lepep Seselwa sa garanti ki poudir sa bann defi pe ganny adrese e ki mon espere ki poudir tre byento nou pou kapab pe antre dan sa nouvo lelan kot sa bann defi i ava par deryer nou e Lepep Seselwa i ava kapab vreman pe viv lo en nouvo lavi kot fristrasyon i ganny sorti e atraver sa mon espere ki lasante mantal nou pep i ava osi vin pli form, parske sa dimoun i ava annan mwens traka.

Me Lepep Seselwa, pep Seselwa sa pep ki mon kontan. Annou aret met nou dan problenm. Annou aret rod bonnonm dibwa pou rezourd nou problenm, bonnonm dibwa pa rezourd okenn problenm li. Annou adres bann dimoun, bann profesyonnel ki ava ed nou. Adres bann dimoun ki i annan en serten konesans. Annou sorti dan sa lespri kot nou

krwar sa Malgas ki pou ed nou.

E si mon pe dir sa, se parske malerezman ankor enn fwa ou a krwar ki ozordi i annan bokou dimoun ki per pou koz avek lezot e zot trouv zot pe tonm dan zot prop lanfer e apre sa nou trouv zot pe detri zot lekor.

Mr Speaker, mwan mon en dimoun ozordi kot nou ete mon annan tou rezon pou mon dir i annan lespwar pou nou pei. Nou annan gran lespwar devan nou e 24mwan apre ki nou'n pran sa ladministrasyon, devan mwan mon trouv en lazenes ki ranpli avek lantouzyazm. Mon swiv bann program kot bann zenn i partisipe. Lot zour mon'n trouv sa 2 zenn La Batie ki ti vini, 2 zenn garson ki'n vin bann fermye e ki pe servi teknolozi modern.

Mon trouv bann zenn ki a pe sey kre ban nouvo platform pou zot nobou pas zot konesans resevwar konesans. Mon trouv bann zenn ki pe devlop zot talan artistik, mon vwar bann zenn ki pe ganny bann bon rezilta. E la mon profite pou mwan felisit tou sa bann Seselwa ki lannen pase zot ti parmi bann meyer dan zot legzanmen IGCSE lo nivo enternasyonal.

Toulezour mon zwenn bann Seselwa, mon anmenn zot *State House*, sa semenn

mon'n zwenn Miss Meme en zenn madanm ki'n al partisip dan son premye konpetisyon bokse epi in tourn avek en meday. E ki dir avek mwan, Prezidan mon ankouraze e mon anvi fer pli byen ankor. Mon anvi ganny sa meday lor dan zwe Losean Endyen. Sa i donn lankourazman.

Letan mon trouv sa zenn madanm ki vin nou *Chief Fire Officer*, ki ankor enn fwa i dir avek ou li pour li i vwar sa koman en vokasyon. Letan mon trouv nou bann zenn *Cadet* ki ti partisipe pou ede tenny dife lo *landfill*, bann zenn manmay me selman i annan en determinasyon ekstraordiner.

Mr Speaker, tousala i donn mwan lespwar, letan mon trouv nou bann dimoun trwazyenm az ki pe reorganiz zot, la ki *COVID* in en pe deryer nou, pou zot fer legzersis, pou zot zwenn ansanm. Letan mon ekout nou bann *teachers*, bann *teachers* kot zot in selebre zot lazournen e ankor enn fwa zot pe eksprim zot kontantman ki mannyer zot anvi anmenn sa profesyon lo en lot nivo.

Letan mon koz avek bann zenn *nurse* ki montre ki poudir zot leker i vreman ladan e ki se en profesyon ki zot pe rode.

Alors devan nou mon ban ser, frer seselwa mon trouv bokou lankourazman. E nou dan sa

ladministrasyon, setou ki nou pou fer. Nou pou met divan anba zot lezel e se la ankor enn fwa kot mon dir avek tou bann departman Gouvernman, ede met divan anba lezel nou bann zenn. Ed zot pou zot al pli devan, ed sa travayer pou li ganny sa sans satisfaksyon dan son travay ki i fer. Ed sa enn ki pe pas dan serten difikilte pou li remont ankor, pou li re debout ankor. Se sa ki nou bezwen annan koman en pep, se sa lespri ki nou bezwen annan koman en nasyon pou nou kapab toultan avans devan.

Alor ozordi, 24 mwan pli tar mon krwar ki nou tou nou'n kapab byen fer *assessment* lo kote nou ete. Nou tou nou'n vwar kote i annan negativite e ankor enn fwa mon fer en lapel. Retir negativite, ranplas li avek pozitivite. Retir zis rod problem, ranplas li avek solisyon e si nou tou nou vin bann dimoun ki rod solisyon nou pou kapab vreman fer nou pei avans devan.

Alor tanto mon anvi dir avek tou bann dimoun ki'n travay dir pandan sa 24 mwan e bann ki pe antre dan travay avek sa lespri travay dir, mon anvi dir zot pei i rekonnèt zot, pei i dir zot mersi bokou. Sesel i fyer ki zot in ede pou kre sa larises kot ozordi nou'n trouv nou en pep vreman fyer.

Mon remersye tou bann dimoun ki'n rann sa servis apropiye, sa polisye ki letan sa telefonn in sonnen dan stasyon in pran li koman son priyorite pou li ale e asiste sa fanmir ki dan detres. Sa Seselwa ki letan in trouv son frer dan soufrans in arete, in arete in donn li en pasaz. Letan in vwar en touris ankor enn fwa, in vini in asiste sa viziter pour fer ki sa viziter i kapab anmenn en bon mesaz e sa mesaz i kapab ede pou fer nou pei avans pli devan.

Mon remersye tou Seselwa ki'n reste alert a tou nivo e alor mon tir mon sapo avek zot e mon dir annou kontinyen travay pou nou zoli Sesel, annou kontinyen travay pou fer nou paviyon mont pli o posib. Pou fer li flote. Parski ozordi nou pe koz lo nou patriyotizm, nou a pe koz lo ki mannyer sakenn antre nou, nou annan en rol pou zwe, pou fer sa pei devlope.

Pa depan zis lo Gouvernman, premyerman komans avek ou menm e apre sa ou ava realize ki poudir Gouvernman se ou menm ou osi.

Alor Mr Speaker, letan mon terminen mon dir ki Bondye i kontinyen beni nou zoli pei Sesel, protez nou, permet nou pou konn plis prosperite. E permet Gouvernman pou kontinyen

reste avek bann prensip demokratik. E atraver sa bann prensip pou nou kapab donn nou pep sa ki meyer. E letan Bondye i protez nou zoli pei an komansman par mwan ki annan sa responsabilite ozordi. An pasan par *Cabinet*, an pasan par tou dimoun ki annan responsabilite. Mon kapab dir en keksoz. Fodre zanmen nou les Sesel tonbe. Mersi bokou.

(APPLAUSE)

MR SPEAKER

Prezidan, lo lapar Lasanble Nasyonal mon remersi ou pou ou diskour. Mon remersiman spesyal pou bann parol lankourazman e apresyasyon ki ou'n eksprimen pour nou travay Lasanble. Mon bezwen pran lokazyon osi pou remersye ou e atraver ou bann Minis e bann zofisye Gouvernman ki la, pou zot korperasyon ki zot in donn Lasanble dan zot travay. Parmi nou lodyans isi, nou annan bann zofisye ki enterakte pli souvan e pli profondeman avek nou Lasanble dan nou travay.

Lasanble e Prezidans i 2 brans Gouvernman, me nou pa rival, nou a konpetiter. Nou tou nou annan menm bi e sa pou travay dan lenter Lepep Seselwa e pou fer avanse nou pei.

Permet mwan remersye tou nou envite apre midi pou zot prezans, pou ki zot in pran letan pou zwenn nou pou sa lokazyon. Mersi osi nou bann Manm Onorab pou zot prezans e zot partisipasyon.

Finalman, les mwan remersye nou *staff* ki'n travay pou organiz sa lokazyon e mon touzour repet nou apresyasyon pou zot travay dir ki zot fer pou fer nou Lasanble marse.

E en pti mo remersiman osi pou bann Lenstitisyon Nasyon, parey Lafors Lapolis ki'n anbelir nou lokazyon avek zot prezans a latansyon. Mersi bokou Prezidan, e mon swet ou bon kouraz, bonn kontinyasyon pou ou travay e sirtou mon remersi ou pou eksprim sa dezir pou nou vwar linite Lepep Seselwa. Mersi tou dimoun, nou ava zwenn deor pou en pti antretyen e mon swet zot bonn kontinyasyon pou lafen lasemenn.

Lasanble ava *adjourn* e nou ava re zwenn Mardi prosenn 9er pou travay. Mersi.

(ADJOURNMENT)